

[Augsburg], 29. August 1572

An Theodor Zwinger

UB Basel, Fr. Gr. I 11, fol. 343r.

S. Egi iampridem, Clariss[ime] et doctiss[ime] vir, cum D. Ostermanno, ut tuam apud Weitmoseros causam δι' ἐπιεικοῦς ἀναμνήσεως, ageret. Fecisse puto: ut ex literis eius intelliges. Episcopius quod ad Demosthenem attinet, satis mihi fecerit, si duorum exemplorum defectum de quibus nunc ad Prallium scribo, et gnomologiam è nondinis (si prius, ut vereor, non licuit) unà cum typis meis, ad me miserit. Vtar et in posterum eius opera, si ille opuscula mea non contempserit. Camerarius egit mihi gratias de Demosthenis (!) sibi missi (!). Quare Episcopium errasse in nomine puto, qui se Hartungo dedisse, scripserit. Idem addit: Significaui etiam mea Ethica adhuc detineri Basileae ἀνέκδοτα, ante triennium illuc missa. Quanti igitur nostra fiant, apparet. Modò in absoluendis notationibus περὶ τῶν ἐν τοῖς πράξεσιν, elaboramus: ut caeteris illae addantur: ἵνα ὁ πόνος εἴη ἐκείνος ὀλόκληρος. Hactenus ille: qui cui typographo illa miserit, ignoro: et, ut scirem, parum proficerem: qui lucubrationes meas, nisi te fideliss[imum] ἐργοδιώκτην habuissem, fortassis ipse nondum vidissem. Quaeso ergo te et de sene optimo atque doctiss[imo] 73 annum iam agente, bene merere, et cura, ne prolem posthumam relinquat: et per occasionem ad illum scribito, morae causis expositis, ne senectutem suam contemni putet. Vale, et me χρήσει καὶ κτήσει tuum putato. 29. Augusti 1572.

Hiero[nymus] Wolfius.